

國  
朝  
文  
錄

紫竹山房文集卷三

錢塘陳兆崙句山著

後學上高李祖陶欽

高安胡如玉醒

○○○予告資政大夫前任廣西巡撫工部尚書衛公別傳

公姓衛氏諱哲治字我愚號鑑泉河南懷慶府濟源縣人由諸生

選拔起家縣令性惻怛能急民疾苦爲興久遠利而於籌荒政也

尤詳累官至監司開府初終如一雍正八年廷試大學貢生列

優等發江南試用初署贛榆縣未甚知名十年調知鹽城尋實授

時值蝗災著有災賑紀略例數千百言文繁不載又設六條以拊

循里戶一曰優禮德望二曰饋餉高年三曰旌獎孝義四曰經理  
焚獨五曰譏警游怠六曰約束過犯蓋卽近世保甲法而寓以古  
意最爲切實邑北門二里有司河匯上游七縣之水入海每患夏  
旱水不得畱內水微弱則海潮越口而上致河鹹苦不可飲甚乃  
漫溢民田農事以廢其秋水盛時則又患河寬流緩入海不速公  
乃建閘立斗門五磯心四又建越閘斗門三磯心二蓄洩有備化  
斥鹵爲膏腴又歲有涸出灘地給無業人領種毋許豪佔其已沉  
沒而糧未除者悉請豁免貧戶漸饒沿灘築土墩九十餘座以防  
大潮猝至漁者得就墩逃溺號之曰救命墩由是循聲大著乾隆

二年調繁長洲清豁坍荒追賦十餘萬兩七年兼攝吳縣篆其冬

為荒政

遷知海州會州饑設法賑救全活二十萬人流民自山東來就食

者更不在此數上聞嘉其治行擢知淮安府河決陳家堡漂溺

為荒政

男女田廬無算哭聲聞數百里公亟遣小舟數百載餅餌分給流

移躬涉風濤所在存問民慶更生勘使臣巡閱所部公隨行百姓

各手炷香前迎填塞街巷使者以為迎已也辭之令退眾應聲曰

衛公活我故來致謝微衛公我曹魚鼈久矣使者為停輿歎息久

之事在乾隆十年是年山東歉甚四境流民至者不可計數公輒

為荒政

自捐俸益以勸募樹草屋百十間銜結二百餘里清江浦屬之魚

溝以北號曰棲流所。每所給粥糜。儲米薪衣藥之屬。賤其值以市。  
流民如歸。制府尹公上其事。上益以爲賢。明年遷廬鳳穎巡道。  
尋調任登萊。公於山東民有舊恩。所至繞與褰帷。諦視輒喜。曰。果  
衛公也。尋遷布政使。再擢巡撫安徽。十六年迎駕行在。賞賜  
甚渥。御書化洽皖江四大字榜。以示寵榮。其年二月。以母憂去  
位。公仕宦二十年。纔兩任山東。實未滿歲。前後多在江南。江南故  
澤國。苦潦多偏災。而荒政之弊百出。能吏難之。又水患迭興。頻由  
平時不預籌蓄洩。加以大部持例嚴若一。不中程輒責賠償。以故  
守令逡巡。養患噤口。不敢倡聲。卒至大耗帑金萬萬。猶不能救而

公累任以辦賑顯其孜孜興建歷有實績最後在安徽用沈石聚  
○通○行○沙之法以移無爲州急溜而防未然至今潁江郡縣多遵用之蓋  
惟民事是急不恤已私卒亦未嘗因是坐累且階以進秩至大官  
則向者諸守令所藉口殆未必然也十八年六月服滿入覲得  
旨畱京署戶兵二部侍郎事是年秋江南安徽寧池滁和鳳潁泗  
九郡復被水而徐州張家口洪河入洪澤湖下游鳳陽懷遠等處  
患且亟大吏以聞時上在熱河復命公馳驅出撫至則部署精  
審南人復賴以安明年十月調撫廣西二十年三月以父逾七十  
請養不許八月以疾告又不許尋內擢工部尙書在任候代明年

正月固請得回籍調治卒于家年五十有五

舊史氏曰衛公在兩部時予爲京尹每朝參遇公端門輒一握手蓋爲實張者殊與意所擬才能大吏不類嗟乎是古所謂惴惴者歟公又喜爲詩秘不肯出余獲見一篇于年譜中淝淝乎元次山之遺也次山當藩鎮擅命崎嶇容管間自謂與世聲牙而公遭遇聖明擢以不次名榮朝列澤在生民其福命豈不遠勝古人哉吾于公又何憾焉

一起提明立案以下委曲發明結處綜核一段百折千迴語少意多令人玩味不盡

江蘇巡撫都察院右副都御史王我園先生傳

公諱師字資甫號我園山西平陽府臨汾縣人也先世自太原遷  
焉傳二十有五世而生公公父曰理躬字翼之用軍功誥封明  
威將軍康熙己酉武舉會吳三桂反滇南投名兵部願以殺賊自  
效朝廷壯之遣之漢中備任使賊平授江南蘇州城守營守備  
尋遷守遼城晚節歸田貧至無以自給益其家以忠清著聞云  
公年二十有四爲康熙癸巳舉於鄉越十有七年雍正庚戌成進  
士凡六上公車而後得旣久困場屋績學益深於一切人事之情  
僞時務之利病罔不究悉嘗謂其子紹武等曰剝民以奉君吾恥



焉。至於私營田宅，抑又出若輩下矣。又曰：律本人情而定，必洞達人情，然後可以推原律意。雍正癸卯，知大名府元城縣事，有卹地名王勝瞳者，田久荒而歲徵如故，凡數十頃。前吏重變科則莫以告，特請於大吏除之。乾隆四年，調知清苑，時下曲有冤獄已定讞，得報待決有日，而冤民所聘女聞之，誓與夫同日死，道路憐之，流言謂惜王青天不早至，以致冤斃二命。王青天者，元城人所呼而清苑仍之者也。公旣微聞其事，廉得冤狀，力請於大吏再三，始得覆鞠，竟脫焉。旣出獄完婚，夫婦詣縣堂拜謝，長號以去。七年，遷知正定府。八年，遷分巡清河道。九年，隨大學士高公斌吏部尚書劉

公於義勾當直隸水利。周歷保定河間天津正定等處。所學盡  
事宜。多被採用。功成。上聞而賢之。十年遷直隸按察使。尋遷浙  
江布政使。九月調任江南。明年左遷天津巡道。越三年復爲浙江  
布政使。是時兩江總督黃廷桂以士民望幸。請上南巡。報可。公  
善體聖意。絲粟不以累民。民若不知有此事者。風聞於  
上。特擢江蘇巡撫。時季冬月二十有一日矣。明年

聖駕至。召問民間疾苦。悉陳奏。無隱。及旋。蹕扈從。召對如前。  
御筆書額以賜。曰吳會風清。時以爲大臣榮遇。名實克副者當首  
推云。自往返行營。疊承顧問。恩寵莫比。回署後。每中夜巡廊而

行圖所以報稱者或無故泣下家人莫識其意竟以是年八月卒  
官年六十有二卒之日家無餘財妻子扶櫬西歸行纏蕭索剩有  
殘書故劍而已禮部侍郎長洲沈公德潛爲志其墓投筆歎曰此  
古所謂清白吏不忝其家聲者也夫人鄧氏子三人

贊曰吾前後爲記注官七年侍上久知上心乎百姓爲古所  
未有比歲巡行方國輒先期降詔肯誠大吏纖悉毋擾民間所  
至橋梁宮觀之屬繕葺而已不期華侈而奉行者或自懷狐疑轉  
相恐動窮極心力以飾觀瞻上以事旣迄功成物不毀聊一寓  
目笑而領之其實非聖意之所樂也同年友王公莪園之在浙

聖意愛民而大吏不能體可歎

予方以憂居里親見其事則見市不易廛津無改渡埋齒掩骼收  
卹暴露插竹樹籬包容荒穢窮黎有僱值之利富民無加派之擾  
但欣欣望幸安堵以俟其後上幸西湖過南屏將取道於松嶺  
之東麓有司奏是間多編戶墳塋且犖确未汎掃請更擇其使者  
上曰何傷乎南北山頭多墓田朕聞之熟矣而是時王公已爲江  
蘇巡撫隨駕在杭杭人始悟公之所以獲眷者政由  
聖主之愛民也爲布政使尙爾使永其年於巡撫之任其利賴更當  
何如爲巡撫則既有微矣使其位爲尙書宰相其霖雨天下又不  
知何如也惜哉

以其家法清忠著聞起以清白吏不忝家聲結中間標明善體  
聖意而畱於贊中痛發揮之極爲得體

處士施君舊山別傳

君諱謨字在廷號舊山浙江嘉興人後遷錢塘父

公與錢塘

謝氏姻姪投分最密謝氏無子請于

公曰公故多子而某獨

無兒蒙見憐輒觀三郎敏悟善讀書願可爲嗣俾身後得從渠假

一盂麥飯可乎

公既素與謝厚又感其言酸痛許之歸卽強

君以行山是寄姓於謝謝賴以起家後謝自得子君乃歸宗數往

來杭州置生產因占籍焉平生以孝友信義方嚴著稱乾隆二十

有六年病終正寢距生于康熙辛未年七十有一方君之出繼謝

氏也謝以大賈中衰家日以落迨君棄故業治生事于時厯遊大

江南北陟五管下七閩蒙犯瘴霧垂十餘載而謝氏復以隆起。有以貳心譖君於謝者。君聞慨然曰。所以竭厥效區區者不敢忘先人之命。顧謝已有後義。當去即不去。亦何詫乎。人言遂簿計。用宅及歲時出納之數。大會親族。一一宣示。隨於眾前傾筐垂橐。辭於謝氏諸謝。及在座見者。始知謝氏見難。視前增數倍。君又不私一錢。爭固留之。不可謝。爲握手垂涕。贈以行資。不受。眾咸歎息。君故居嘉興郡城。見二人在焉。兄弟故相愛。往依之一日。告其兄曰。二兄以勞苦農務。至蓄聚。而弟顧居閒坐。享其逸。不忍向在謝氏。與杭人習。當就彼謀營。以冀自拔。二兄慨然。各贈金若干。君量受。

其半遂之杭州賃屋以居稍積貲歸金其兄○兄○亦○通○兄拂然曰弟乃以我  
爲非人也曰非也人事消長不可知萬一蹉跌欲更貸兄金兄詎  
不可復見與耶且與爲耗散而重困孰若得子而歸母由此以思  
金之歸弟之福而阿兄之所樂也二兄曰善自是家于杭後二兄  
相繼歿君歸經紀其喪撫遺孤以至成立嘗欲啓二親窆改兆會  
城之西而嫂氏不許不得已瀝血書木主瘞於艮山施家橋之麓  
又數年卒扶柩葬西湖法相嘗語其家人曰吾親存不能養歿又  
不能以時上塚是無人心也吾所爲非必於古有合但求吾心少  
安而已言訖淚下聞者悲之娶文山孫氏少君九歲君中年目疾



四人

時作晚節益昏花不見物蓋由間關百越烝淫中腐理所致然兼綜家事纖悉治辨非獨神明不衰抑孫佐助之力居多子四人長楷次光遠又次錦前卒又次光輅遠輅見爲諸生並有文譽孫贊曰吾觀施氏子孫言貌恂恂動中禮法其伯兄以少年治家事羣學治經書各殫厥職皆能以和順色養其親閭門之內雖離如也嗟乎其所由來者漸矣舊山處士遇諸子嚴教自非角又其素行足以感動興起之夫不閱艱難無以顯性行之美不積清素無以致碩大之報是故高明之家鬼瞰其室再實之木其根必傷天

道惡盈福謙。較然不爽。舊山之孳孳爲善而福未稱。德爲其子若孫者可不勉哉。

世間乃有此人。鄙夫可以寬。薄夫可以敦矣。文亦全副精神。墨無滂瀟。

○太子少保禮部侍郎徐公行狀

按年譜公名元夢字善長號蝶園姓舒穆祿氏舒與徐滿音略同而字義亦近故天下稱蝶園徐先生公知名早仕宦垂六十餘年性剛介負氣不苟隨人可否中年以後精研理學益以涵養言貌溫溫若惟恐傷人者而中持白黑卒無所依違附和蓋信道篤而力行不惑者也公生十有九年成進士改庶吉士乙卯散館以主事用越九年由主事改官中允充日講官起居注遷侍講康熙二十六年命入內廷授皇子書同官德格勒善言易爲言事者所劾事連公下獄免死入辛者庫三十八年起爲內務府員外

鄧越四年再革職尋起爲內閣侍讀學士壬辰充會試同考官再遷內閣學士出辛者庫距其得罪之始凡二十六年出爲浙江巡撫又二年由巡撫入爲都御史兼掌院學士先是都御史員缺上諭朝廷保舉學問好不畏人如徐元夢者隨有是命六十一年冬駕幸南院公未及從御製詩一章并序副以食品遣使于夜分呼正陽門入卽家以賜仁皇帝侍臣下如此宜其本蓋聖意以病中忽憶及三十年以前詞臣罕有存者故以是貺公凡孤臣直節不容於眾口顛跌至再三在聖祖朝間有而晚節類被榮遇不令湮鬱以終至如既老而蒙異數如家人婦子則惟張伯行李光地及公數人而已

憲皇帝卽位。以舊學故。特重公。有加禮。雍正元年。山工部尙書。協理大學士。充明史總裁官。改戶部。四年。坐繙譯訛誤落職。在內閣學士裏行。八年。再黜。坐撫浙時失察案。

今天子改元之初。復內閣學士。遷禮部侍郎。充實錄及三禮館總裁。仍命入上書房授書。皇子四年。加太子少保。六年之冬。公疾革。上遣使問所欲言。公伏枕流涕曰。臣受恩深重。心所欲言。口不能盡。使者旣返。呼曾孫常。取論語檢視良久。乃罷。及卒。上痛恤之。爲頒特詔。優卹視大學士。榮哀備焉。公撫浙時。清約若寒素。捐俸葺敷文書院。書院故號萬松。以公請。上賜榜易今。

名買田聚書以惠學者。高安朱公踵行之。兩浙人文之盛自此始。凡繙譯經書。不經公手。定於文義。或毫釐千里。故今稱善譯。無有出其孫步軍統領赫德之右者。七年。其嗣君爲公卜宅兆。將下窆。求墓誌於今相國西林鄂公。相國之季。故戶部尙書諱爾奇公。爲余庚戌座主。出公門。相國因屬按譜爲稿。草狀其大略。便取擇焉。約不過七八百字。而其人之心術性行。其時之舉錯風尚。無不該括其中。此等文。非先生不能作。末只實補在浙時一事。以其他皆具年譜中也。故前後以按譜成章法。

○○文林郎知楚雄縣事贈通議大夫內閣學士李公墓表代趙相國

公姓李氏諱夢蘭字鄭公江西建昌人今內閣學士兼禮部侍郎雲麓先生之王父也由順治庚子舉人知雲南楚雄縣事卒官配吳氏同邑處士某之女具有懿迹載家傳雍正六年某月日合窆於邑楊山越十有二年雲麓屬爲墓表予以薄劣備員政府與雲麓共晨夕有年知公生平事特詳詳故不勝書書其大者康熙十有七年逆藩耿精忠反閩中偏師直走豫章所在殘破公時以孝廉家居召所親及大姓鄉氏吳氏與計曰保鄉圍義也死王事忠

也○諸○君○得○無○意○乎○愈○曰○諾○於○時○刻○期○而○集○者○萬○餘○人○上○其○籍○簡○親○  
王○府○請○當○一○隊○王○及○巡○撫○都○御○史○壯○而○許○之○公○率○萬○餘○人○嬰○城○固○  
守○邑○賴○以○全○公○故○以○文○藝○先○多○士○居○鄉○謹○厚○未○有○知○公○勇○者○至○是○  
里○人○益○愛○敬○公○歲○在○戊○午○公○出○宰○楚○雄○經○兵○燹○後○瘡○痍○未○起○吏○牽○  
於○考○課○急○徵○斂○甚○乃○累○八○年○之○逋○并○徵○之○民○不○能○堪○會○朝○廷○遣○  
使○巡○邊○取○道○楚○雄○公○徒○跣○草○服○遣○使○者○告○曰○下○吏○奉○職○無○狀○以○催○  
科○之○不○善○俾○邑○父○老○鬻○妻○子○且○盡○雖○然○願○以○數○萬○口○累○公○使○者○曰○  
曷○言○之○制○府○公○泣○曰○所○以○告○公○者○以○制○府○疏○格○於○部○議○也○公○  
天○子○近○臣○倘○以○所○見○疾○苦○言○之○上○上○至○仁○聖○特○未○悉○其○狀○耳○



語畢刺血作書淋漓數千言使者感動爲賁以去未幾有詔蠲免雲南省逋賦八十萬有奇民困大蘇卒之日民繪像祀焉建昌士大夫合辭請於朝崇祀鄉賢由是大江以西稱德門首推李氏雍正二年以孫雲麓貴贈如其官子二長玉瓚儒學訓導次玉堂由知縣歷按察司副使孫三長卽雲麓名鳳翥曾孫人只磊磊明明敍此兩事而其人自足不朽先生表誌之文皆以畱侯傳體行之所以獨潔

○太子太保光祿大夫兵部尚書總督河南河東河道提督軍務謚愨敬張公神道碑銘

河南儀封張氏清恪公諱伯行康熙朝仕歷江南福建巡撫內擢侍郎以廉直名海內

聖祖仁皇帝嘗稱爲天下第一清官其仲子師載字又渠號愚齋初得官陞見先帝指示宰臣曰此張伯行子好司官

今上眷遇益隆每召見輒詢及隨父任時事天容溫霽賞賜

優渥公固以報國活民爲心用是益感激奮勉懼有玷缺爲名父

壽乾隆甲申以東河總督卒於位年六十有九公由丁酉鄉舉得

一品廕補戶部員外郎雍正元年出授知揚州府直揚州歲饑散賑而高郵湖西之民緣被災分數少輕不得與公行部至其地見道旁人多骨立待盡大驚召長吏詰責隨請於上官不待報而廩之凡活男婦數千口江都之芒稻閘爲淮黃高寶諸河入江之關鍵所司貪商人餌惟知蓄水爲運鹽地藉口必奉嵯使令乃開會夏潦暴漲低田盡淹公訪知運鹽須水六七尺而旣過其半遂單騎馳往督役啓閘纔啓四板水暢出甚疾仍艤舟宿其旁明日田皆涸出然後走白嵯使使者大悲責公專公謝曰知府信有譽矣第拯溺不淹刻必預請而後行如此萬家烟火何後竟具文上大

府請歸府轄許之。芒稻之屬府啓閉自此始。公雖隨滿格公外任。全○神久晨夕惟讀父書及研精宋五子之學。不與吏事尤於水利絕少見聞。乃其出守初政卽已可觀。若此故才智由惓惓以出。而其一生周歷中外顯職遂與河務相終始。豈非冥冥中有意篤生爲聖朝宣力者歟。自知府遷秩兩任河庫道河庫掌管鑰不任功過向爲美官公以才爲前後督臣所信倚輒委辦險要大工以故於河務淺熟悉乾隆十年遷江蘇按察使未任調江西尋內遷右通政。明年七月由宗人府丞擢倉場侍郎。命閱視天津河道旋以侍郎出副江南河督十有六年。

上南巡接駕道授江安巡撫仍協理南河事明年秋充省試監臨在閘中而河溢二閘徐州被衝公與文定高公並褫職在工贖罪又二年放歸丙子起爲兵部侍郎五月遷尙書總督漕務丁丑正月調今任時山東孫工口決賈船漕艘如泛大海中公冒風雪河岸燈燐燐達曙如此閘冬春疏築始完公嘗言河東水勢土性與江南異兩岸相距寬宜多挑引河以殺險土多浮沙宜厚集客土以實虛自此由濟寧治所抵開封歲往來如織而公心力亦瘁於是矣先是乾隆三年在河庫任伯兄某病故原籍而王母王太夫人在堂遂尅期告養上官固畱不可前此雍正末河督文敏嵇

公母卒蒙在任守制之命。將具摺圖請終喪。眾以違旨獲罪。爲疑。公慨然進曰。公父孝母節。門望非常。患請之不力耳。何禍之觸。文敏謝曰。謹受教。其在江西。嚴無故遷葬之禁。奏請連坐。法薄俗。竟革撫江安二年。多偏灾。皆據實上聞。請恤全活甚眾。痛懲厯名。訐告時習。以靖地方。盡資孝以事君者。不敢惡於人。因之宣德達情。而澤流百姓。亦固其所。凡此皆清恪之教也。公平生治水方略。有著書藏於家。其隨時措置條理。及一切治行。已具諸城相國志中。而長君景渭之子承重。裕穀及次君景沆。又次後伯兄者曰琦。復合辭遣信詣余。可以崖略揭之碑。銘曰。

子孫只如此。帶出又是法。

禹跡既湮。治河孔艱。上策難行。在漢已然。或議棄地。墳廬蕩焉。匪徒眾譁於心。何安意惟深。刷去沙是急。廣開支港。以通其塞。於末求本。此猶計得。增庠培薄。救時之爲。爲之實務。亦大有裨。毋忽蟻穴。庶屹金堤。惟公任勞。南北周遭。保障千里。通行萬艘。清恪有訓。毫毛無競。只此俸錢。無慚見。聖家風清白。如秉繼震。鬻產奉公。破家積行。帝鑒其誠。諡曰愨敬。爰賜祭葬。松楸輝映。哀亦增榮。善斯衍慶。樹碣道旁。永爲世鏡。

通篇以清恪作主。文體嚴潔。雖僅揭崕略而自見。全神真大手。

筆

○。吏部尚書協辦大學士諡文恪劉公墓志銘

代史相國

公姓劉氏諱於義字喻旂號蔚岡江南常州武進縣人由翰林起家躋通顯出入中外荷三朝眷遇累官吏部尚書協辦大學士諸封光祿大夫加太子少保年七十有四卒於位

天子覽遺疏震悼賜諡文恪以葬初公在翰林文譽甚著康熙晚年聖學益懋翰林官凡有擬撰慮不稱旨輒推公公爲之

輒報可以故掌院學士倚公若左右手

聖祖知之而以官資淺未大用同官亦但以公職於文未之奇也憲皇帝登極元年以原銜充日講起居注尋擢侍講視學山西還



朝遷待講學士順天府尹五年遷詹事又遷總督倉場戶部右侍郎自是屢歷外任七年奉使甘肅明年拜吏部左侍郎賑山東饑奏發倉粟百餘萬石白金十萬旋命協巡撫事其冬以侍郎督直隸河道又明年晉刑部尚書攝直隸總督事乞貸饑民坐盜論死者百餘人並奏除直隸爲盜不分首從皆斬之令旋改署陝西總督自爲坊官至列卿開府纔八年耳所至能宣上德意以仁恕爲心而性沉密習勞苦能辦大事當是時

先帝以承

聖祖休養之後吏民恃寬大爲奸欺懼遂積玩不振銳意釐剔以

嚴明持之而淺見寡識之徒動欲以谿刻中上意顧輒得譴責  
獨公孤立排羣議所陳請無不充者蓋惟  
先帝之聖有以成公之賢而公之卓然有立使天下不敢薄文字  
爲無用致少損

先帝知人之明則洵足光耀朝廷且爲詞臣增氣者也凡公之  
奏使西行也甘肅自康熙末至雍正四年凡虧帑金一百六十餘  
萬文書散缺莫知其由公爲設法清理一一歸款無誤及後任總  
督部署西師往返凡四年一切屯田築堡安集流移輸送軍糧戰  
馬心力俱始故公之在西勞最多而亦以所領過繁不任吹索乾

隆三年挂吏議罷官。尋起直隸布政使司。遷福建山西巡撫。八年十一月。召爲戶部尙書。明年晉今官。又明年加太子少保。上素識公。旣廢復起。官階屢進。公之不敢以老病乞休。亦以此。曾祖祖父並知公貴。累贈如其官。配氏贈一品夫人。前卒。自有銘。子男二。長曰復。雍正甲辰進士。翰林院編修。改浙江糧儲道。前卒。次益。乾隆辛酉副榜。刑部雲南司員外郎。孫三人。曾孫五人。銘曰。銘不錄。

此題入他人手。定逾千言。此係落落。括中間。錫發。

憲皇帝所以救弊用人之故意。格俱高。

○光祿大夫都察院左都御史仁和金公墓誌銘

休寧歐山金氏。自元處士湄以來。代有偉人。以文章顯。其先本程氏。唐上柱國歙州都知兵馬使湛裔。十六世至湄。幼孤無依。母將之。女兄適金氏。應元實撫育之。喪妻。以女湄之子曰佑曰仁。以仁後。應元喪子。卒無嗣。佑復以季子于後金。而于之同產曰兆曰任。二支子姓繁衍。迄今又十餘世。仍金姓。不忘本也。公諱德瑛。字汝白。一字慕齋。又號檜門。曾王父曰章奇公。字爾常。任之九世孫。於兆之九世曰聲正希先生。爲兄弟行。正希以文名世。爾常見世衰亂。獨棄書治生。僑寓常州。遂豪于財。百餘年來。近屬幾千人。皆賴

以養生送死公故有富名以此其實分張歲息衣食粗足而已性  
好古下筆必力追作者工書法出入晉唐善鑒別金石摹本及古  
人手跡真贋日以此自娛顧其畱意世務所見聞輒入告不以非  
其職自諉上因是賢之浸至大用乾隆元年由丙午順天鄉舉  
貢禮部廷試讀卷大臣置公卷第六上特拔第一授翰林院修  
撰自是連充福建江南考官公故籍寄吾浙江仁和其宗人皆在  
休寧故邑例應引避辭不許七年視學江西連擢侍讀右庶子滿  
三年特旨獎畱十有二年還朝擢侍讀學士少詹事當是時海  
內文風甚盛盛極弊生競爲詭澀公自束髮操觚熟精理法於編

義源流正變靡不洞徹所至人不能欺十五年遷太常卿十七年  
代祀古陵於山西既藏事有釐正祀典一疏其詞爲都下傳誦略  
曰伏見女媧氏寢宮中設婦人塑像鄉愚奉爲求嗣之神夫斷鼈  
立石固聖人所不言和樂誅凶豈當陽爲女主推其命氏蓋如姬  
姜姚姒之倫遠在洪荒難求曰留龍顏之肖宜毀去舊設別造神  
牌瀆褻私祈概從禁絕上善其議從之是年四月視學山東十  
九年遷內閣學士明年遷禮部侍郎其秋典江西鄉試先是丁卯  
歲自學政還朝值齊魯告饑上大發帑金賑救而鄒滕以南被  
災尤劇有司格於例限未敢以聞公入對言狀卽日奉旨展期

另敘亦類敘二自學政還言一自典試還言以見其留意世務

博濟至是自興試還道出徐州黃河故道向繞徐城東注是秋澍  
雨暴漲河決上游孫家集奪溜微山與運河通兗州金鄉魚臺諸  
縣漫爲巨浸而徐州故道以涸公挾土人策杖登雲龍山周咨水  
性○地○勢○得○其○所○以○去○所○以○就○所○以○壅○所○以○潰○所○以○消○長○悉○陳○上○前○  
卽日特遣大臣往勘如其言用大興工築水患以平自雍正初申  
再省出議論  
嚴學臣貪穢之禁繩以重典上謹持成憲用法益果京員出使  
者類能廉能自守然或以清素故節蓄過當至於幕下賓友寥落  
所經佳山水多不挂眼其于地方利病益無所關人亦不責而公  
愴愴然體國愛人之心形于不自已如此二十有六年由直隸學

政擢今官所條具臺省便宜悉稱旨其冬寒甚以奉命巡視  
通倉得疾越歲而病竟不起年六十有二公家累世孝友父馭齋  
先生碩論卒後伯兄德鉉繼歿持家惟叔父詢蘭舉一人丙辰  
覃恩特疏陳情可以本身應得地封得旨報可辛酉冬銜命  
渡江復請假歸拜封君里門畱十餘日于是遂奠淚先塋張筵老  
屋並召同社父老會飲極歡時公意以春秋方富似此天倫之樂  
當不止一再見於卽事畱別諸篇而二十年來往來南北竟未暇  
續舉蘭舉已先公六年下世矣益人生會合時少其在宦途又加  
少間一有之多自謂草草未滿意庸詎知未滿意之境卽其至少



而不可再得者耶。嗚呼。是可慨矣。爾常公之子曰敦頤。自爾常而下。皆以公貴。誥贈光祿大夫。如公官配。皆一品夫人。公元配汪氏。生七子。曰忠湜。早卒。忠澤。見任國子監主簿。候補員外郎。潔。丁卯。舉人。忠濟。甲戌。進士。見任河南遂平縣事。忠淳。國學生。忠沂。忠泉。皆幼。孫二人。忠濟子。後忠湜者。曰孝本。承重。二十七年八月。孝本等扶柩南歸。將奉汪夫人殯合窆。而求志其墓。某於公之交。可以終年不見。而不能一日不思。不自知其所以然也。今已矣。銘曰。

柱國之裔。育金而昌。富貴有時。盡而不朽者。文章官。稱其人。以道。

途老雖以是老亦以是得仰取俯拾遐搜幽討方其陟匡廬過玉  
峽過康王谷坐臥於雪瀑雲松屏與臺而侶樵牧見者忘其貴人  
又先後度霞嶺俯劍津循道山之麓步炎海之濱縱觀鷗波賈舶  
之衝薄而欲遺其形神既乃維舟歷下梯閣登州休彈子之旋渦  
賦大曆之危樓弔坡翁之遺躅爲長吟以消憂若其開歲入朝頻  
邀扈蹕吉林一至木蘭三出每倚馬而廣詩興皇情之歎息  
後採風輦下閩山前後擊壤吹葦或童或叟又何有於文普香臺  
荆高渡口倚茲山川之助增長骨氣疏瀹性靈日作十字平原永  
興鬱發揮於篇什則韓子與杜陵嗟乎檜門吾不知後人之議論

奚似而其不可磨滅者。稿草具存。吾又不自意先生生天而後死。得爲公書石荒原。念平生之約誓。聊以妥其幽魂。

前幅寫其畱心世務後段寫其家世孝友銘則補寫文采風流絕不重複

○○○中憲大夫知黎平府事 晉封中議大夫兩淮都轉鹽運使

### 何無墨先生墓碑

按狀先生姓何氏諱經文字友三號無墨浙江山陰縣人元至正間始居縣之峽山六世祖詔明官保工部尙書五傳至職方員外郎育仁育仁生貢士曾舉是爲先生王父以從父文烈公騰蛟分支湖南遂占楚籍曾舉生鼎亦以楚籍前丙午鄉貢歷官知嘉興府因葬焉遺令子孫回籍山陰後先生葬王父於峽山承先志也先生七八棘闈不遇年四十有五始以諸生入粟助邊儲康熙庚子得銓知普定縣普定安順附郭邑也自履任後一切嘉惠士民

○檄○開○○○○○生○○用○之○○

行於境內者皆不書事具家傳黔中諸苗不勝數狝苗最頑狝苗以劫奪爲生業者不勝數廣順鎮寧二州爲劇普定界接二州先生用密計禽二州劇賊賊不敢窺安順境而府屬別邑狝苗曰老卜本與鎮寧苗阿汝等糾聚入城戍富人取其貲制使高文良公以聞隨馳書普安討平之雍正元年擢知安順府火連嶙者廣順長寨逆苗之尤魁桀者也以蜀人李奇爲謀主猖獗甚丙午有詔命提戎楊某討之連克五十餘寨獨羊城圍未下撫臣何公世堪檄安順佐其軍臨發募部下知苗中扼塞者數人與俱既至按行則聳壁千仞左傍徑如線雖有萬眾不得進先生顧所與俱者曰

圍何以名羊城也有盧生者對曰白中而壁外陡不可上唯羊可  
上故名耳先生首領之卽佯言軍中吾且攀崖夜襲賊營眾以爲  
疑而陰市羊數百頭斷水草二日會夜大霧昏黑乃設伏縱羊散  
走賊草簌簌有聲賊聞以爲我兵四面至遽下木石弩礮如流星  
密雨良久度且盡而所遺敢死士八百人已直趨左徑突登殺其  
守關者賊驚亂自藉墜崖死者相枕遂斬火連蟒獲李奇降其眾  
明年其黨李麻金四復連兵焚劫城邑官軍無如何先生復奉檄  
會勦出奇兵擊其背獲賊首歸先生故文士作吏值苗疆不靖數  
立辦賊功然號令嚴明得賊首卽已撫納甚眾故所在悅服凡旁

國朝文獻  
郡有警。未嘗不在事。廣西土府泗城寨岑映宸。新襲職。其屬擁兵拒命。大學士文端鄂公。時爲制使。將討滅之。映宸恐。間道走安順。陳款乞降。先生卽與偕詣軍門。納地圖。封上印綬。鄂公大喜。於是始奇先生。先是映宸父曰岑齊岱。病且死。謂其子曰。汝性懦弱。不能戢下。一旦有事。獲罪。朝廷則無黜類矣。安順何公。畏者事急。可投之。必能活汝。竟如所策。鄂公遂界紅河以北屬黔。其南歸粵。而令先生周行相視。增置改設文武官署。悉如議奏行。會監司某到官。銜先生不時謁。假廂帑報撫。撫臣何公不能奪。疏上。令鄂公確核。領職如故。尋調知石阡。旋調黎平。滇南達京師。舊驛必經由

黔中崎嶇萬狀人畜往往踣頓若別鑿山厯黔旁邑迤東北行以合於舊路則途較近而夷而密籌荒荆迴互深阻約三百里難以計工集事自康熙中制使蔡公毓榮平吳逆卽建此議中間數更幹吏履勘垂五十餘年卒不能行鄂公奉

先帝下都勻守王某之議毅然欲行之而先生以才新調黎平遂

委成焉自七年八月越明年二月披榛躡莽谷汲巖炊枕虎窟攀

猿藤仆嵌頭擘梗岸壘封築瑩欹危跨飛梁列廨署浮簞渡抗戍

樓纔費帑金五千七百有奇視原估萬四千兩僅五分之二大工

甫竣而坐觀者議其後矣九年竟以勘實冒銷劾罷責償至二千



金猶牽餘累不得去嗟乎老氏之教不爲物先如先生所任事或  
遠控瀕粵兩道近亦繞出其旁郡邑凡人之庸與黠者皆知引避  
而先生輒承命不辭然且厯更上官加以篤信堅委宜若可恃卒  
不得免焉亡何鄂公入相經行新路意頗善之會先生第五子玠  
伏道訟父冤聲淚俱下鄂公大感悟言之新撫某公爲請豁千餘  
金復故職由斯以觀彼幡幡善言論者固不足以禍忠信而其效  
則已能使之急切不得自明至於失位破家舉族飄零萬里之外  
此行道所爲傷心也先生旣復職隨以積勞多病告歸乾隆八年  
兩被徵召相公鄂公郵書促行竟不起几靜息林下及就祿養南

河道焞官署垂三十年戊辰八月卒於維揚年八十有四前此卅四年焞任桃源河廳有安順明經金某單步萬里懷闔屬紳士書款門告曰願得公生年月日及前後官閫勒之碑以志思念先生愕然諭以生祠非古且于例禁是重吾不德也卒謝去之吾旣於先生治境內事皆不書後之覽者於金生一節亦是想其概焉乾隆二年 誥授中憲大夫知黎平府事癸酉以子焞兩淮都轉遷晉中議大夫如其官夫人呂自有傳子所爲伯兄後次卽焞次燧前卒次瑛商邱主簿次卽焞見任興化通守孫裕城理銘曰峽山之裔名德累世迄於先生文武兼備方爲諸生人稱長者一

行○作○吏○殺○賊○驟○馬○文○章○之○豪○氣○壓○韃○刀○大○吏○驚○顧○謙○不○施○勞○內○悅○  
部○民○外○來○遠○人○爲○良○鋤○莠○其○歸○曰○仁○馳○驅○荒○徼○一○身○兩○道○釋○兵○執○  
鑿○夷○途○天○造○專○成○眾○美○矚○其○似○爾○實○不○能○容○奚○逃○鋸○齒○或○躋○之○沉○  
適○翼○之○升○或○初○收○村○卒○乃○耐○膺○君○相○之○心○蒼○蒼○式○臨○功○昭○咎○雪○  
逸○以○山○林○山○林○優○逸○閱○歲○三○十○仁○粟○分○餘○鄰○友○族○戚○爲○善○自○樂○矧○  
享○大○塋○孝○子○順○孫○永○縣○簪○黻○

此○臣○有○用○之○才○屢○平○巨○寇○如○摧○枯○扯○朽○敘○次○亦○極○嚴○潔○如○讀○班○  
范○二○書○後○以○勞○而○受○累○卽○前○安○順○新○路○記○文○妙○無○一○筆○重○複○

○文林郎知江南黟縣事夏紱先生墓誌銘

凡官州縣者無論遷調及被議去其吏民題去思於碑或雜進衣履挂銅木斗於其聽事

先帝深知其弊嚴禁絕之而其人之真以顯何也彼遷與調者其

勢固在也即被議以去雖失勢而其好名之心與力固未可測也

惟至於身死而人思之不置甚乃其歷任所治之人皆思之不置

則其爲循吏始信吾家知縣側儀字夏紱由雍正八年庚戌進士

作宰垂二十年南北各三調任最後知黟縣事頗不習水土故不

迎親官署而留妻子在籍侍養子膺笏等歲一至省父或間歲相

代乾隆十有七年以勞勩卒官得年五十有四卒之後四日縣父

老數千人走數十百里以崇祀名宦願請於其郡太守以故君之

身○解○人○思○  
次補北○與南事然只虛為其思○

賢聲至死而益彰君之初任於北也雍正癸丑知安肅縣事乾隆

戊午補懷柔中間以母憂去前後在任纔三年然其去懷柔調密

雲懷人巷哭而密人相慶於道蓋二邑犬牙相錯彼有所聞見以

信之其素故也所任密雲五年以他故去職乙丑起知江南鳳陽

縣未浹歲調懷寧越五年調黟縣其在懷寧之歷歲與在北之密

同而所得於民者尤深黟之父老既得請於太守將上之大吏而

奏之天子同時懷寧之人不期而會願於府者亦以千數

有似以得配君爲榮且樂者吁觀民情之若此則君之魂魄亦思樂其鄉而安於血食時其晴雨以福其老幼如古所傳述古耶理或然也按狀君諱儻字夏紋父先生勅封文林郎如君官母荆贈孺人子膺笏絳縣訓導次膺紳膺錫孫三人君之卒封君在堂痛之甚明年六月遭其長孫來京師款予門長跽而請曰不孝將于某月日藏先魄於某山之原丐先生念同牒之誼志之礦石敬將王父意陳不腆願無辭予歸其幣而諾焉且爲之銘銘曰

實補○在北政蹟○  
維畿紫邑實繁旗莊

國初畫界令毋侵疆旗不諳農取租出佃

或退居民售受兩願久之在旗則指厥初而民黠者影射爲欺訴  
牒如蝟步尺告莽譁動九閭勘煩朝貴惟君之賢兩造稱便民無  
壅情公可化頑皖江之俗免身殺女君爲治之勤以苦語亦有愿  
氓埋骨振窮君重勸之豎碣紀功自其筮仕三十加四由北而南  
六更厥治四鄰苦蝗弗犯循良禱雨輒應人比法王匪徒佛之又  
呼爲師口講指畫日月爲期何期日月遽爾奄忽燕山風號吳江  
雨泣緬君之靈比戶薦馨神嗜飲食其樂如生

此又補

南○北○並○結○

文寫循良吏到處去思之情藹然可掬然只是空寫實蹟于銘  
中一一表出文法變化而實一絲不紊真老手擅場之文

。奉政大夫戶部山西司員外郎前提督四川湖南學政翰林院檢討陳君復齋墓志

吾家復齋諱象樞字馭南一字復齋江西撫州崇仁縣人世居邑之北耆里乾隆十有八年九月以戶部山西司員外郎卒邸寓得年五十有八復齋自雍正八年成進士起家吏部迄今二十餘年以戶曹終中間兼翰林銜督學楚蜀凡四五年家居垂十餘年計其在部之日甚少而兩部掾吏憚其神明同官亦共推爲公正精覈如久於其任者復齋之視學四川也院吏循故事迎之境上以五百金爲道里費復齋正色卻之自是且拙俸以助諸吏廩給諸

先安頓其部政

學



弊肅清。蜀人大悅。以比其前學使陳公瓚。稱二陳夫子。其在湖南。故事。每按一棚。諸生出錢少許。納之官。名曰銖末。通所部累銖計之。不下萬金。學使者亦藉是以延賓從。贍童僕。及一切舟車之用。復齋亦拒不受。幕中有爲謀者。謂宜上聞請裁。則謝曰。吾少耐勞。苦畏健於閱文。頗有兼人之力。故費省而事辦。後之人少不及吾。卽力絀矣。故不爲也。當

高○公○在○此

聖祖仁皇帝之末。天下學政號爲清官者曰陳瓚。曰高安朱軾。仁皇臨御既久。海內殷富而又。堯天浩蕩。緩誅貪邪。世宗憲皇帝卽位。銳意振刷。厥弛乃張。凡試官犯贓。左証明白。則

執而戮之無留獄。

今上仰遵成憲用法尤信○有○情○對○起○惟諺有之曰康熙年間有清官雍正年○間無清官非無清官也夫人而能為清也顧其所謂情者未必卽陳朱之比。

先帝知之而救弊之道不容不加激勸就中往往以剔除陋例超○其○分○界○處○在○有○市○心○與○無○市○心○有○市○心○則○趨○風○氣○而○制○大○官○授大官如復齋之清至今不過五品且下其原銜一等矣得非其○無○市○心○則○率○本○性○而○下○原○銜○刻○酷○之○文○而○出○之○乃○若○不○經○意○生○平生無異人之為若嚮者不從幕議之類居多耶嗟乎此乃所以○齋○復○齋○者○非○凡○人○為復齋也復齋丁內艱既釋服以湖南在內誤收考生被議降二級由是家居傾囊中裝倡修大成殿及其宗祠召還既析居之

昆弟貧乏者仍與同爨。庚午北上則分薄田令得自給。然後行。夫復齋處脂膏不以自潤。所節嗇而僅有者。度亦無多而用之若惟恐不盡。如此則復齋之居官。其以爲名乎。匪直不爲名而已也。其以爲身乎。與其子孫乎。復齋初成進士。高安公時爲相。國昌言於朝曰。是吾鄉知名士。然吾未嘗識其面。以是益重其人。未幾實授選司主事。遷員外郎。再遷禮部精膳司郎中。出督學政。乾隆三年。移節湖南。歲十有五年。自家起用。論者謂蜀人二陳之稱誠然矣。顧前陳以清故開府福建。其位遇差亞於朱。而後陳獨不幸中蹶起。不久遽死矣。此亦復齋之命也。前此二十年爲選司官時。官解

不戒於火。焚其選冊。吏更造新冊。復齋知其詐。於煨燼中檢得舊  
檔字。未滅者過半。細校卽所稱旣燬者。注籍歷歷可考。吏大驚匿。  
其新冊。復齋亦不復責。取有註誤官某某例。得開復爲吏所格。復  
齋爲列上其名。口誦舊例甚悉。卒復其官。其人踵門謝終。不予見。  
前輩謂仕宦廉明而入於谿刻。弊甚貪庸。復齋豈有懲乎此哉。乾  
隆十有六年。以覃恩授奉政大夫。祖父皆贈如其官。元配劉封  
宜人。子三鼎稷泰孫五珪璠璫璋鼎扶。柩南旋時。丐余志其墓。  
數四聲淚俱下。使來知葬有日矣。用推闡大略。以塞孝子之意。  
從謝請。裁陋規。發出議論。敍一人而一時之政體風尚。皆見此。

之謂作史之才他家無此識亦無此膽此先生文之所以獨絕  
後幅重獻累歎亦逼近歐公

○ ○ 拜鄂文端公墓祭文

寅年戌月策蹇城西過帥府之古巷感羣鳥之晨啼於時微罔無  
聊回瞻東路出郭門兮三尺冰莽河沙兮十里霧循燒痕之野灣  
辨羅城之遙樹樵童指而告余曰此大學士鄂公墓也方月之晦  
夫人與郎君皆在焉則遂振策款門探懷出刺隨風葉以到堂遽  
哭聲之出戶已而諸孤伏地致辭謂相君之歸化怪記注之來遲  
每問疾者踵至輒呼字而詢之知還朝其尙遠時起坐而咨嗟鳴  
○舍○下○初○已○呼意可知已今某則實來而不復得聞其咨嗟太息但見苔篆豐  
碑霜封片石尙可言哉則有酬恩一紙莫淚雙摘咽欲語以如忘

跪而陳其副墨辭曰。嗚呼。世人哭死。猶稱功德。不知聲塵緣形在。而送歡喜。魂靈以勢去。而分黑白。譽亦不加。悅晉亦不加。戚况公之正直。聰明而窮。是之屑顧。亦有不能以已者。大凡附翼攀麟。懷印童弱。而公之起。不關華閥。雌伏鵠袍。卽潛粉闥。中間垂二十年。左圖右史。澹泊自若。讀書學道。鬱極而發。用是受知。

先帝疊被寵輪。出入將相。爲社稷臣。逮今。

天子嗣位。倚任愈堅。典隆配食。詔及生前。而公承以勞謙。克襄。

下武三惑。是祛四知。是矢晚乃善病。寢撫隆棟。特賜几杖。勿煩。

倖僥。間詣朝堂。九垂目送時。或正色無言。或執卷莊誦。能令槐。

○寫○出○大○人○物○○不○須○類○上○卷○

聖朝○其下士○引山自巳受○知

棘○之○間○隱○然○大○重○又○凡○列○鼎○擊○鐘○蔑○視○藿○食○畫○餅○名○流○拱○木○膏○碩○  
公○則○以○聞○道○之○後○先○鏡○人○倫○之○優○絀○誠○衣○褐○而○懷○玉○輒○倒○屣○而○繫○  
襪○兆○崙○生○由○窮○巷○學○缺○深○功○徒○倚○父○母○之○恩○予○之○資○性○君○師○之○  
德○假○以○雲○風○究○竟○虛○聲○純○盜○旦○氣○難○蒙○每○品○題○之○逾○分○俛○無○地○之○  
措○躬○重○以○簡○與○禮○相○背○嬾○與○慢○相○從○形○迹○細○故○能○爲○我○容○嗚○呼○已○  
矣○哉○是○古○所○稱○知○已○者○耶○古○所○稱○知○已○者○或○刻○骨○於○一○言○或○信○心○  
於○一○事○知○之○於○一○言○一○事○則○所○不○知○者○猶○多○而○無○礙○其○爲○知○者○貴○  
大○端○之○灼○見○任○毫○釐○之○微○差○嗚○呼○人○藏○其○心○不○可○測○度○雖○聖○人○亦○  
有○不○知○惟○天○與○神○則○能○知○之○今○公○之○靈○往○來○虛○空○將○以○某○爲○山○野○  
結○在○



○在○此○先○生○之○生○半○○然○言○下○  
之○氣○習○而○傲○睨○王○公○抑○信○某○爲○忤○忤○於○世○態○而○病○止○疎○慵○將○以○某○  
爲○絺○章○琢○句○如○俗○下○文○士○之○屬○而○已○抑○以○某○爲○頗○有○所○韜○韞○而○經○  
緯○之○在○胷○痛○知○已○之○難○逢○而○聊○復○叩○諸○幽○宮○嗚○呼○先○生○其○在○茲○乎○  
以○公○之○英○魂○毅○魄○當○在○廟○楹○之○間○斧○展○之○側○度○此○荒○烟○蔓○草○而○焉○  
足○以○棲○遲○然○則○冥○冥○之○中○又○焉○知○我○悲○嗚○呼○尙○饗○

鄂文端公一代重臣而求賢若渴先生感深知已於墓祭之只  
如說話一場而谿逕自別結處抑塞磊落直欲搔首問天

○祭奉政大夫敘庵李太翁文

嗚呼先生亦竟死耶。至是乃信人欲無死必先無生。先生年距百  
歲。裁千餘日耳。耳目聰明。膚革充盈。割肉以肩數。飲酒以斗論。視  
其子若孫及門弟子。年五六十者。如嬰孩之投抱。而悼其故友以  
七八十歲終者。爲芳蘭之自薰。竊嘗推求其所以久視之故。聞諸  
大戴嗜穀者知慧。而巧嗜氣者神明。而壽則公未嘗呼嘯咀嚼。爲  
焦經而鳥伸。聞諸老氏。上士異室。中士異牀。下士異被。則公未嘗  
鐘魚瓢笠。爲鯨吼而鰥醒。不則上界神仙。不注北斗之籍。必閱十  
萬八千劫。而後返其真。不則冥司主者。陰騭公之善行。爲請於上。

帝弛其約契而特逍遙於商洛之濱是皆未必然或者三尸神服其莊樂其通無所得其過失而轉媚悅承奉如人之繕葺老屋而丹堊之如新是亦未必然然則豈天實詔之謂古今之文皆吾山○或○不○至○六○其○六○年○矣○爲○之○一○矣○河日月之光氣所圓鍊而就中亦有粕亦有精必得老於斯道者爲秉鏡而持衡又謂凡下界之單門孤士吾所以貧之賤之憂蹙之具有深意而庸耳俗目率意恣情摧折不得其平必得有意乎斯人者爲引接推獎以玉汝於成是數說者後說最近故期頤至而文統亦就門人盛而大限以臻嗚呼痛哉如先生其必不爲鬼而爲神其必不爲神地上而在杳冥其在天上之神宜何爲乎其

非修文郎非蓉城主直與汗漫期乎九垓之上騎箕尾而爲傳說之星

狡獪之文只用一筆寫出